



LAPORAN LIPUTAN MEDIA

KHAMIS / 13 JUN 2019

- 1. FAMA SEDIA BANTU PESAWAH**
 - **UTUSAN MALAYSIA**
- 2. NAIKKAN HARGA BELIAN, JIKA HENTIKAN SUBSIDI**
 - **UTUSAN MALAYSIA**
- 3. PESAWAH PERLUKAN BIMBINGAN**
 - **UTUSAN MALAYSIA**
- 4. PADI ANGIN, RUMPUT SAMBAU JEJAS PESAWAH**
 - **UTUSAN MALAYSIA**
- 5. LATIH PESAWAH UNTUK TANAMAN KONTAN**
 - **BERITA HARIAN**
 -

DISEDIAKAN OLEH :

CAWANGAN KOMUNIKASI KORPORAT

(MADA)

KERATAN AKHBAR : UTUSAN MALAYSIA

TARIKH : 13 JUN 2019

PERKARA : PERTANIAN

FAMA sedia bantu pesawah

Oleh MUHAMAD AIMY AHMAD
pengarang@utusan.com.my

ALOR SETAR 12 Jun - Lembaga Pemasaran Pertanian Persekutuan (FAMA) bersedia untuk membantu pesawah yang ingin meningkatkan pendapatan mereka melalui perusahaan tanaman kontan dengan menyediakan pasaran dan bimbingan bagi menghasilkan tanaman yang berkualiti.

Ketua Pengarahnya, Datuk Ahmad Ishak berkata, pihaknya memiliki sebanyak 3,334 pusat jualan di seluruh negara termasuk pasar-pasar tani yang boleh dimanfaatkan pesawah untuk memasarkan hasil tanaman mereka.

Menurutnya, agensi itu juga pada masa sama bersedia memberi maklumat berkaitan jenis tanaman yang sesuai ditanam golongan itu berdasarkan kajian jumlah permintaan yang dilaksanakan FAMA.

"Kita menyambut baik saranan Perdana Menteri, Tun Dr. Mahathir Mohamad agar pesawah melibatkan diri dalam tanaman kontan seperti buah-buahan dan sayuran kerana sumbangan mereka juga



AHMAD ISHAK (kiri) bersama Pengarah FAMA Kedah, Anuar Mohamed menunjukkan buah mempelam harumanis dalam majlis jamuan Hari Raya FAMA Negeri Kedah di Alor Setar, semalam. - UTUSAN/FARIZ RUSADIO

mampu mengurangkan jumlah import selain menawarkan bekalan yang segar pada harga berpatutan kepada pengguna.

"Terdapat beberapa jenis tanaman yang kita boleh syorkan seperti tembikai, jagung manis, cili, timun dan pelbagai lagi yang boleh diusahakan oleh para pesawah mengikut lokasi, jenis tanah dan kesesuaian waktu me-

nanam," katanya ketika ditemui pada majlis Hari Raya Aidilfitri FAMA negeri, di sini hari ini.

Mengulas lanjut, ujar Ahmad, pihaknya akan mengadakan kerjasama dengan agensi-agensi lain di bawah Kementerian Pertanian dan Industri Asas Tani untuk menggerakkan usaha tersebut bagi membantu pesawah mem-
pelbagaikan pendapatan mereka.

Utusan Malaysia 13/6/2019.

TARIKH : 13 JUN 2019

PERKARA : PERTANIAN

UTUSAN MALAYSIA • KHAMIS 13 JUN 2019

Naikkan harga belian, jika hentikan subsidi

Oleh MOHD. HAFIZ ABD. MUTALIB
pengarang@utusan.com.my

■ ARAU 12 JUN

KERAJAAN boleh menghentikan pemberian subsidi kepada petani dengan syarat harga bagi pembelian hasil keluaran mereka perlu ditingkatkan 50 sehingga 100 peratus.

Pengerusi Suara Tani Malaysia, Mohd. Shazwan Suban berkata, kaedah tersebut dilihat berkesan bagi membantu para petani meningkatkan pendapatan mereka tanpa perlu bergantung kepada subsidi.

"Dicadangkan agar harga padi ini dinaikkan kepada RM2,500 satu tan jika pemberian subsidi ini diberhentikan. Pada masa ini, harga bagi satu tan padi hanya RM1,500.

"Jika ia berjaya dilakukan, segala bentuk subsidi boleh diberhentikan. Langkah tersebut juga berkesan untuk para petani bersaing bagi meningkatkan hasil seterusnya mendapat pulangan yang baik.

"Subsidi yang diberi oleh kerajaan kira-kira RM3,000. Nilai tersebut bukan sepenuhnya dapat dinikmati oleh para petani memandangkan harga ra-

cun dan barangan pertanian lain mahal pada masa ini," katanya kepada *Utusan Malaysia* di sini hari ini.

Semalam, kerajaan mengenal pasti beberapa langkah untuk menangani kemiskinan golongan pesawah yang selama ini bergantung kepada pemberian subsidi.

Perdana Menteri, Tun Dr. Mahathir Mohamad berkata, antara langkahnya meningkatkan kaedah pertanian moden selain memperkenalkan tanaman konstan seperti sayur-sayuran dan buah-buahan bagi meningkatkan pendapatan.

Kata beliau, antara masalah dihadapi mereka adalah kerana mempunyai sawah yang berkeluasan kecil untuk memberi perolehan pulangan yang baik dan tidak efisien dalam pengeluaran hasil pertanian.

Mohd. Shazwan mengakui rata-rata petani khususnya pesawah terlalu bergantung kepada pemberian subsidi sehingga menyebabkan mereka tidak produktif untuk menambah pendapatan.

Pada masa yang sama, beliau juga bersetuju dengan kenyataan Perdana Menteri bahawa para pesawah hanya bergantung kepada hasil tanaman padi tanpa mencuba tanaman lain.

DALAM NEGERI



"Subsidi yang diberi oleh kerajaan kira-kira RM3,000. Nilai tersebut bukan sepenuhnya dapat dinikmati oleh para petani memandangkan harga racun dan barangan pertanian lain mahal pada masa ini,"

MOHD. SHAZWAN SUBAN

KERATAN AKHBAR : UTUSAN MALAYSIA

TARIKH : 13 JUN 2019

PERKARA : PERTANIAN

Pesawah perlukan bimbingan

ALOR SETAR 12 Jun -Kerajaan perlu memberi bimbingan dan bantuan kepada pesawah sekiranya hendak menggalakkan penanaman kontan khususnya kepada mereka yang tidak mempunyai tanah selain sawah padi.

Ini kerana, rata-rata tanah di sekitar kawasan rumah pesawah hanya boleh diusahakan pada skala kecil dan tidak sesuai untuk dikomersialkan secara besar-besaran.

Seorang pesawah, Abd. Rahim Said, 53, berkata, langkah tersebut amat baik dalam usaha meningkatkan pendapatan para pesawah sepertinya, namun mereka belum jelas mengenai mekanisme pelaksanaan termasuk tanaman kontan yang bersesuaian.

"Kalau tanah bendang

pula memang tak boleh digunakan untuk tanaman lain apatah lagi tanaman padi kini dilakukan dua kali setahun, jadi tidak sempat untuk sulam dengan tanaman lain jika ada yang bersesuaian.

"Bagi kaedah pertanian moden pula memang boleh dilaksanakan tetapi kosnya terlalu tinggi sehingga mencecah puluhan ribu ringgit untuk mendapatkan sesuatu mesin atau jentera," katanya kepada *Utusan Malaysia* di sini hari ini.

Justeru, Abd. Rahim berkata, cadangan tersebut hanya boleh direalisasikan sekiranya mereka diberi bimbingan yang betul termasuk menyediakan peluang pasaran tanaman kontan bagi meningkatkan pendapatan masing-masing.

Utusan Malaysia

13/6/2019.

Utusan Malaysia 13/6/2019

Kerajaan atasi masalah padi angin

PARIT BUNTAR 12 Jun - Kerajaan negeri akan mencari kaedah terbaik untuk mengatasi masalah pesawah yang taumuan mereka terjejas musim ini ekoran serangan padi angin dan ancaman rumput sambau serta keladi air.

Pengerusi Jawatankuasa Kemudahan Awam dan Infrastruktur, Pertanian dan Perlindungan negeri, Abdul Yunus Jamhari berkata, masalah itu mungkin disebabkan benih padi yang tidak berkualiti.

Menurutnya, selain itu masalah lain seperti ancaman rumput sambau dan keladi air mungkin disebabkan sistem pengaliran air yang tidak sempurna.

"Kerajaan negeri akan mengkaji punca masalah ini dan menyelesaikannya bagi memastikan pendapatannya pesawah tidak terjejas," katanya.

Beliau berkata demikian ketika ditemui selepas merasmikan Mesyuarat Agung Pertubuhan Peladang Kawasan (PPK) Tanjung Pandang Kali Ke-42, di sini kelmarin.

Abdul Yunus yang juga Ahli Dewan Undangan Negeri

(ADUN) Kuala Krau mengulas keresahan pesawah di Kampung Sungai Betul di Tanjung Pandang dekat sini yang mengalami serangan padi angin melibatkan kawasan seluas lebih 40 hektar.

Padi angin adalah sejenis padi yang mudah relai dan akan gugur ke tanah sebelum sempat dituai hingga menyebabkan kehilangan hasil



ABDUL YUNUS

tanaman itu. Sementara itu, Pengerusi PPK Tanjung Pandang, Abdul Latif Mat Ali meminta kerajaan menitik balih pindaan yang membenarkan pertambahan jawatan Ahli Jemaah Pengarah (AJP) yang boleh dilantik pada peringkat PPK, Pertubuhan Peladang Negeri (PPN) dan Pertubuhan Peladang Kebangsaan (Nafas).

Menurutnya, lantikan tersebut adalah lantikan politik dan dibimbang ia akan disalah guna oleh pihak tertentu termasuk mewartik individu berkepentingan dan bukan dalam kalangan ahli pertubuhan berlesen.

Padi angin, rumput sambau jejas pesawah



SHAMSUDIN SULAIMAN menunjukkan padi yang diserang penyakit padi angin ketika ditemui di Parit Buntar, Perak, baru-baru ini.

Oleh A. MALEK ASLIE
@maalekaslie

■ PARIT BUNTAR 12 JUN

PESAWAH di sini bimbang hasil tanaman mereka mungkin terjejas musim ini ekoran serangan padi angin dan ancaman rumput sambau serta keladi air.

Para petani mendakwa kawasan yang terlibat seluas lebih 40 hektar khususnya di Kampung Sungai Betul di Tanjung Pandang dekat sini.

Padi angin adalah sejenis padi yang mudah relai dan akan gugur ke tanah sebelum sempat dituai hingga menyebabkan kehilangan hasil tanaman itu.

Ketua Unit Peladang Sungai Betul, Shamsudin Sulaiman berkata, masalah itu dikesan ketika anak padi berusia lebih dua bulan.

Menurutnya, pelbagai usaha dilakukan untuk mencegah serangan padi angin dan rumput sambau serta keladi air dengan menggunakan racun rumput rampai namun tidak berkesan.

"Padi angin tidak ada ubatnya dan ia terpaksa dibiarkan begitu sahaja. Kos racun rumput rampai yang saya gunakan untuk keluasan sawah yang saya usahakan termasuk petak sawah yang disewa mencecah ribu ringgit termasuk upah meracun," katanya ketika ditemui baru-baru ini.

Shamsudin mendakwa, antara punca masalah itu ialah sistem pengaliran air ke petak sawah padi yang tidak mencukupi, menyebabkan sawah selalu kering dan mempercepat pertumbuhan rumput rampai liar.

"Jika musim lalu purata padi setiap hektar tiga atau empat metrik tan padi tetapi akibat penyakit ini hasilnya mungkin berkurangan," katanya.

Pesawah, Ali Ahmad, 40, berkata, serangan padi angin, masalah rumput sambau dan keladi air dijangka menjejaskan pendapatannya pada musim ini.


"Sebelum ini jika pesawah berdepan dengan masalah padi, kerajaan memberikan intensif kerosakan padi sebanyak RM600 tapi kini sudah tidak ada lagi," katanya.

Sementara itu Ahli Parlimen Bagan Serai, Datuk Dr. Noor Azmi Ghazali mengulas perkara itu berkata, beliau akan membawa masalah itu ke peringkat Pusat.

KERATAN AKHBAR : BERITA HARIAN

TARIKH : 13 JUN 2019

PERKARA : PERTANIAN



Minda Pengarang

Latih pesawah untuk tanaman kontan

Tanaman kontan perlu difikirkan dengan serius bagi meningkatkan pendapatan pesawah supaya mereka terus memperoleh pendapatan walaupun kejatuhan harga komoditi sekarang.

Tanaman kontan seperti jagung, harus manis (mangga), nanas, cili, timun dan tembikai misalnya, boleh diusahakan secara besar-besaran yang mampu memberi pendapatan harian. Tanaman kontan ini juga boleh diusahakan oleh peneroka FELDA sebagai alternatif terutama di kawasan tanah yang sudah tidak sesuai untuk penanaman sawit.

Projek tanaman jangka pendek berkenaan dijangka mampu meningkatkan pendapatan. Namun, harus fikirkan juga ialah pasaran untuk hasil tanaman itu dan bagaimana memasarkannya yang memerlukan mekanisme pemasaran tertentu.

Namun, pesawah juga harus diberi latihan dan di sini Kementerian Pertanian dan Industri Asas Tani, Lembaga Pemasaran Pertanian Persekutuan (FAMA) serta Institut Penyelidikan dan Kemajuan Pertanian Malaysia (MARDI) boleh membantu dari segi kaedah penanaman, pemasaran serta latihan, termasuk penyelidikan.

Berita Harian 13/6/2019.